

[Augsburg], 15. Juli 1564

An Johannes Oporinus

UB Basel, Fr. Gr. I 11, fol. 273r.
Steinmann Nr. 763.

S. P. D. Incolumitas tua, Mi D. Oporine, mihi non minus iucunda est quam mea. Te Deus etiam posthac tueatur. Chartas Suidae accepi statimque D. Villingero misi nec recepi. Editionem totius operis expecto ad proximas nondinas. Titulos Isocratis, Demosthenis et Aeschinis mitto, de quibus tu arbitratu tuo statues, et de posteriore opere scribes quid decreueris. Omnes meae lucubrationes tuae sunt, quencunque socium ascieris, mea nihil refert, modò ne editio faeda et depravata fraudi mihi sit. Illum etiam nouicium typographum, quisquis est, monebis, vt liberalitatem erga me tuam imitetur. Ero enim annotationibus conficiendis et recognoscenda versione dies noctesque occupatus, vt per nostrates bibliopolas primum saltem Latini Demosthenis tomum Francofordiam tibi mittam. reliquos deinceps. Vlpianum, quamuis depravatum et mutilum, et saepè ineptum, non puto omittendum. Graecum exemplum à me emendatum habes domi. Eius versionem meam mittam vnà cum Graeco Demosthene, olim ad Graecolatinam editionem adornato, et epistolis Aeschinis et Demosthenis à me correctis, et indice anno 1555 confecto, si quis forte vsus eius esse poterit. Paraenesin Latinam cum commentariolo grammatico accipies in nondinis, reliqua satis tempestinè graecolatinum Isocratem, si aliud exemplum non habes, ex defectibus concinnabis, aut vtendum sumes, p<ropte>r graecas et latinas marginum annotationes, quas inter se consentire oportebit. Nam meo nec ego carere propter operas scholasticas, nec vti tu poteris ob lituras. Vtinam maturius certiores me de tuo consilio fecisses. Iam enim confecta omnia mittere ad te potuisse. Nunc angustijs temporis et mole operis excludor, ne quid praestem laude dignum. Nihil enim accuratius vel emendare vel annotare potero. Alioqui autor fuisse castigationes et annotationes meas, vt et Vlpianum, non seorsim excudendi, sed cum ipsis orationibus coniungendi. Id enim longè accommodatius est lectori, et in Vlpiano saltem non censeo negligendum imitatione Heruagij maioris, cuius filium monebis, vt Basilium sub autumnum sartum tectum mihi remittat, quò Consulis et mea fides liberetur. Vale. Vt valeat D. Carinus scire cupio, qui iandiu nihil ad me scripsit. Idibus Iulij 1564.

Hiero[nymus] Wolfius
Tuus.

Si correctionem erratorum ad te non misero: in fine Suidae culpam meo nomine depreceris velim, et moneas lectorem atque roges, vt ea, considerata sententia, aut collatione graeci codicis, ipse emendet. ὡς γὰρ ἡδυνάμεθα.